

四庫全書

集部

欽定四庫全書

集部

張燕公集卷二十五

詳校官侍郎 臣 謝墉

檢討 臣 何思鈞覆勘

總校官編修 臣 王燕緒

校對官主事 臣 陳墉

謄錄監生 臣 許溶

欽定四庫全書

張燕公集卷二十二

唐 張說 撰

碑文 碣文 碑尾文 石柱銘

和麗妃神道碑銘奉勅撰

舊史云軒轅帝宮次星具苗龍之體郊媒神祀次妃成  
玄鳥之命非聖也莫能法天非天也莫能感聖則有相  
乎坤而母乎震齊乎古而合乎天跡雖秘絕猶可測而

言也麗妃趙氏天水人也麗者以華美為貴妃者以配  
合為尊易云日月麗天傳稱星辰為度麗加妃號自我  
為初原夫八駿勤周肇有封姓三軍霸晉乃蕃卿族設  
寶符而開國曳珠履而成家果驗成宣之後不乏文忠  
之慶堯門昭殿何代無人暨乎紫氣上通瑤臺獨立楚  
宮選美納良袂於神雲漢拔求才進團扇於明月故坐  
而論教則位比三司動而具瞻則儀刑六列者矣先將  
軍以恩澤授職太夫人以有禮封鄭流車躍馬豈無甲

觀之親湫宅開門不有椒房之勢探風揆化憂國如家  
故聖人有以尚其德也躬親繭館義形熊檻退席以愛  
禮膠木以廣恩望古難臻之地必為常踐之域故聖人  
有以嘉其志也懸象告泮經時寢疾在蒙被之辰荅還  
輦之問生可捐於浮假心獨係於玄貞神徃上清願承  
恩而入道形歸下土期去禮而薄葬慈顏同氣奚敢為  
言皇上閔而許之咨嗟不已開元十四年春秋三十有  
四七月十七日葬於春華殿殯於龍興觀之精屋示以

出家從道例也命河南尹監護河南令副焉喪葬務約成遺語也二十六日窆於故都之後邙山之陽孺慕承華淒涼薄室列薤歌於東路迴容衛於北山壽堂一閉兮凡聖等人代同悲兮修短間月帔雲衣襚以神仙之服上房陶簋旋於造化之初此皆聖主之曲成賢妃之本志何必雲陽山下別起通靈之臺未央宮中虛立致神之帳若夫易名之典考行是存帝謚曰和禮之貴也氣之和者生萬物聲之和者孕八音魂知後命感聖恩

乎有詔史臣恭銘內職事出彤管辭無華飾寫樂池之  
永傷寄瑤山之罔極銘曰

帝妃佐后實掌陰教八月選才千金聘貌禮獻絲繭詩修澣濯婦  
政可尊嬪風須效皎皎漢女為皇降靈娥娥邦媛順道之經結以  
印綬華光後庭帶之弓韜朗潤前星退迷潛運夙承嘉獎謙苦

中京崎嶇上黨金鏡開日明珠耀掌心方樂於時泰魂奄悲於  
化往紫雲衣兮霓裳送美人兮北邙白壤宮兮青松苑去君恩  
兮日遠秋風急兮霜天草木黃兮野田滅香容於空柳留畫

像於甘泉春秋以麗和之二字獨褒美於千年

鄔國長公主神道碑

臣聞堯有娥英致九族之敦序舜有霄燭動百里之光  
耀大聖之後天必縱之積善之家神所慶矣豈惟上帝  
之女雲漢為靈平王之孫肅雍其德連華前志世有其  
人皇唐鄔國長公主者睿宗之第七女也母曰崔國妃  
構累聖而成門合濟美而為室蘊乾坤之純粹演日月  
之清明神媛誕靈常言所絕免懷之歲天奪聖善不食



三日哀比成人文母流胎教之慈曾子得生知之孝由是宮闈延矚邦國遠聞及乎玉笄耀首油駢在馭錫之美地邑以荆山求之令族嬪於薛氏爾其居玩圖史動修法度服其澣濯恭儉之教興鼓其琴瑟敬讓之風被其行已也安親惠下之謂仁敬宗合好之謂義降貴接卑之謂禮恕情周物之謂智推心而行罔不該備其理家也侍饗饗餼之均和主饋醴醢之品齊絲竹五音之微靡纂組九華之縟麗經目所涉莫不精詣每至三元

上賀五日中參進對詳華折旋舒婉故以式瞻貴里儀  
範通門如千花之泛惠風百卉之涵膏露窈窕之儀克  
舉蕃衍之福大來有男子四女子五瑤碧生堦芝蘭滿  
室也習禮明詩目漸庭闈之訓銀章艾綬地連恩澤之  
侯自先朝徹宸之辰迄今公主成笄之日外降過制內  
疾餘哀手寫金字梵經三部躬繡綵線佛像二鋪貝葉  
真偈現心相於銀鈎蓮花妙容呈意生於玉指孝思惟  
則道遠乎哉開元繼明推恩由已進封鄖國長公主食

邑一千百戶田賦廣而彌儉禮秩尊而益恭其後君子  
晨歌夫人晝哭未亡為稱生意盡矣撫視遺孤持守栢  
舟之誓志期剝落永從柰死之遊朝制斷恩改降鄭氏  
陵谷可移隋和之德不昧寒暑有遷松筠之性如一均  
養七子麻蔭二宗汾陰之室忘亡滎陽之黨相慶既而  
善福虛應寢疾彌留盡國醫之技遠方畢至供御府之  
藥中使相望命之必至不可支也堂邑山林忽焉瘁色  
平陽歌舞適足愁人開元十三年二月庚午薨於河南

縣之脩業里春秋三十有七震悼紱庭哀傷朱邸傾家  
若墜舉國同悲有詔光祿卿孟溫禮監護喪葬京兆尹  
馮延休副焉窀穸之禮一如涼國公主故事夏四月恩  
旨陪葬於橋陵不祔不從古之道也皇上念同氣之致  
美感閔川之永謝恨棠華之半缺悲瑤草之先化乃命  
國史昭銘懿迹降恩禮於雲露寫哀詞於金石水非湘  
渚還起帝子之祠山是洛陽即封天妹之塚銘曰

帝系白雲仙源紫氣張家成國承天作貴赫赫聖祖曰

文曰武皇睿宗一變萬邦挺生淑媛慈和孝恭清曠  
如神蛾眉無雙邱第立官湯沐建封爰及笄總禮施環  
珮鳴鳳獻祥乘龍擇對帝唐降女天乙歸妹珠玉過庭  
蘋蘩正內蛟門早聞龍湖忽上無地何載無天何仰金  
殿書經華絲繡像欲報之德昊天罔極孰是言歸良人  
永違銀爐烟斷羅幕霜飛懇願毀形託身壞衣不諒人  
只改嬪他士稟命曰從從人曰順息媯繩楚懷羸霸晉  
反經合權與道同韻燠休二室均歡等潤四海謚清九

族和平萬物向榮衆雛未成心戀盛明形隨落英祖載  
鼎城歸窀咸京挽歌敷聲鹵薄凶行哀哀聖情惻惻同  
生橋山片石千秋令名

延州豆盧使君萬泉縣主薛氏神道碑

或稱達性命者齊生死之域違憂恠者一脩短之數斯  
蓋無心之論耳焉足與議於情哉何則雲虹滅影詞人  
於是詠謠華秀從風君子為之歎息豈不以對仙麗之  
景懷變化而遺戀在韶蒞之節悼零落而偏憤吾見豆

盧氏之子於其伉儷有焉縣主諱字姓薛氏河東汾陰  
人大父駙馬都尉奉宸將軍諱瓘尚城陽公主考駙馬  
都尉散騎常侍諱紹尚鎮國太平公主其在昔也夏有  
車正先封周有薛侯爭長其在今也五宗姻於帝里重  
葉母於王姬河水經天上積星辰之氣霍山鎮地下多  
珠玉之林縣主幼而敏惠長而洵淑貞義孝烈之傳吉  
凶賓祭之儀一聞成誦絃綖組之製涪毛醞羞之品  
一見懸解至乃鶴迴清汎蠹聚崩雲月韻玫砧花穠綵

樹婦人能事咸臻妙焉大聖天后鍊石補天有王母之  
神器分茅列地啟弄孫之美邑封猶有禮義引而親天  
授三年四月內封萬泉縣主天愛下流日親上簡乘龍  
之舉和鳳為難絡八紘以選門奄千官而求俊夫以龍  
圖帝寶祈步搖之華源虎戟侯門襲京燕之雄胄人之  
信美帝用嘉焉以萬歲登封元年仲春既望歸於豆盧  
氏六官送行百寮供事迓以鸞輅遣以翟車環珮冕旒  
璆然在馭黼藻朱黛爛其盈門詔婚之禮於焉為盛爾



乃移其愛敬以事舅姑伸其友恭以諧公妹舉宗洽比  
如鼓瑟琴每至婚姻會同少長咸集珩璜節步金翠耀  
首有婉孌之心無驕矜之色晞眄者若遲日之映連  
漪瞻詞氣者猶光風之轉蘅蕙加以引納懷和饋分周  
賑疎屬自附窮歸忘窘故蘭行彰信於閨門而蕙風滿  
盈於邦國諒惟琬琰之性自美抑亦劬勞之訓致焉中  
宗孝和皇帝雲迴南土龍見東京二儀更闢九族咸叙  
望我兄兮公主贊陶鈞之力曰吾甥也縣主開井邑之

賦神龍元年春加實封三百戶縣主既通籍門闌奉御  
又尚司殿省天子巡遊宮觀觴樂池臺我有周親無時  
不從主家外幸比齊后而睠恩子壻中參與趙王而均  
禮或醉飽無度寒燠未平何嘗不御藥在門王人接路  
當時厚澤莫之尚也景龍四年二月以奉御出為丹延  
二州刺史保傅下堂隨朱轎而同去轎駟入郡與皂蓋  
而齊飛辭宮闕而歲闌戀庭闈而日遠肥泉永歎邪氣  
攻衷楚祝招而不來秦醫來而不及景雲元年八月二

十一日傾逝於延州之解舍春秋二十有四美玉褫顏  
明珠晦色平陽舊宇遂無望於歸寧懷縣新文遂留連  
於永逝有子三人西華南容東里等或亂或岐呱呱而  
泣天何以罰神其忍之冬十有一月五日歸葬於長安  
洪瀆原窀穸營護有命加等器服祖遺率由舊章生之  
也榮葬之也禮若夫柔嘉好合善之原也肅雍降貴謙  
之道也山河其德容潤廣也能羆其祥祚胤大也總衆美  
於脩嫿馳落暉於小年此所以哀中之又哀也昔袁亡

馬氏蔡筆斯奮鄭喪曹姬潘文亦作矧茲內範事華無  
媿砥望夫之石以表靈丘緝幼婦之詞將傳終古銘曰  
薛之重祖胄軒國禹相殷侯周氏其土宇英英白雲鬱  
彼河汾公門蕃衍銘鼎氛氲則仁則義則戚則勲餘慶  
分祉誕靈女士中宗之甥鎮國之子皎如霜雪華如桃  
李舜族爰序堯封咸秩萬泉開賦三百其實守盛以儉  
居冲不溢亦既鳴雁宜爾家人謙恭下下撫納親親傾  
財致客對饁如賓我有邸第前臨黃道我有池塘却望

青草漢輦停暮秦簫拂早歲月易忘歡愉難保良人出  
守將命北徂與子偕往飲別東都望母腸斷辭家淚枯  
露萎勁草霜酸衆雛魂兮何歸京兆之野葬於何處杜  
陵之下巖巖雙闕列列行櫬勒是徽音以觀來者

鄭國夫人神道碑奉勅撰

鄭國夫人者弘農楊氏之女也開元神武皇帝惠妃之  
母曾祖諱諶以禮樂習文為越州司馬祖行以折衝學  
武為游擊將軍父宏以門才入仕為雍縣丞而早卒初

則天之代夫人言歸武氏曰恒安郡王生惠妃及家令忠太子僕信開元十年三月終於通化里其四月卜宅於少陵原哀子銜恤號旻仰訴怨報德而未待託思齊於永慕皇帝悒鸞殿之內憂悵鶴池之外慘揚淑聲而金石刻揭高行而天地感國史司文命為鄭志若夫清明下濟嶽瀆上昇祥會德門慶育邦媛神授孝理之性天啟聰達之心加以潤澤詩書友玩圖傳伯宗好直預戒將亡重耳羈遊先稱必霸豈直漢庭章奏假借仲長

之才周官禮儀咨稟宣文之學昌言嘉論有如此者螭  
首螭領修眉橫波既工嘖笑易為容止肅恭而不跼舒  
和而不倨商周革命遇屯有怡懌之顏桑霍傲予在貴  
無驕矜之色端容一貌有如此者絃綖祭服闕翟朝衣  
纂組入神剪製驚國雕胡之飯露葵之美五齋六清三  
鷄七醞咸一見而洞理或不習而知和女工中饋有如  
此者惠妃載誕皇子在者四人驪泉多龍丹穴皆鳳克  
岐克嶷預見元凱之才實章實討早聞霄燭之豔亦闕

陰德之潛襲胎教之密傳乎又名子以義成家以禮忠者以令德為忠信者以不欺為信傳云去食去信信而有徵經云移孝為忠孝則不置周宗咸覆紀季獨存至德深圖有如此者辟司徒之妻邑其合禮南城侯之婦封其舊功况夫春徽四德四德咸舉經緯二義二義克從匿武收繼趙之勲產姚承配夏之慶吹凱風於椒掖外王母於梧宮盛德大業窮光極榮啟國西鄭不亦宜乎十數年間二子榮立每至四時令節六參嘉會魚軒



照門龜艾交室為壽則珠貝山積侑幣則錦綺霞飛白  
玉滿堂聚姻親而同有黃金作穴散隣里而無餘君子  
欽其布義聖人嘉其寶儉故寢疾則飲食天厨湯藥御  
府匪日伊夕上宮絡繹於閨庭送終則戚儀傾都車騎  
曠日自宮徂野中使相望於道路哀榮之盛書記罕聞  
猗與所謂小君之遺美聖善之高烈者也如使後代考  
南史議西陵披簡牘而歎息臨山源而茫昧旌賁之道  
不其闕而然則外孫之碑武檐之石非明淑之壟其何

設焉辭成進御帝稱曰善顧謂尚札我其書之於是灑  
翰黃縑縷字青琬波橫雲蹙神變豔爛於山門鶴倚鸞  
翔生氣宛延於松路禮尊事絕恩榮迹遠斯又元德動  
天幽誠迴日之奇致也誰昔未覩名言莫逮係曰

代有母德厥氏楊兮祖考為士夫為王兮聖后中葉總  
萬方兮天命未改復歸唐兮賢淑啟佑繼絕亡兮宗周  
雖滅神女昌兮建號西鄭榮舊鄉兮魚軒翟茀盛龍光  
兮二子雙飛華綬章兮出入輪奐庭鞞煌兮去此昭昭

即茫茫兮何處詔葬少陵阜兮貴妃慈親侯王舅兮寒  
暑流易山川久兮古墳坡陲老樹朽兮壽宮靈慶百代  
守兮頌石光後千載後兮

賴川郡太夫人陳氏碑

賴川郡太夫人者諱某雷州大首領陳元之女羅州大  
首領楊歷之妻驃騎大將軍兼左驍衛號國公思勗之  
母陳氏家富兵甲世首嶠外夫人誕靈豪右淑問幽閒  
六行天至不因師氏之學四德生知無待公宮之教原

夫陳本媯水楊承赤泉九真為郡良史出乎中國五馬  
浮江僑人占乎南海兩州接畛二門齊望卜妻鳴鳳擇  
對乘龍楊公有聘玉之祥應嫗獲探金之慶號公弱冠  
昇仕鞠躬禁闈正性本乎胎教剛腸形乎義色神龍三  
年六月五日北軍作難西華失守騎入宮閭兵纏御樓  
公孤劍凌鋒羣兇奪氣倉卒之際安危是屬既立殊常  
之勲遂蒙超次之命授銀青光祿大夫柱國弘農郡公  
行內常侍其後改拜將軍太夫人是加爵邑高堂九仞

重祿萬鍾朝廷美其揚名州黨尊其遠聽夫人富而好  
儉貴而能勤身却錦繡手親紡績公每昏定晨省夫人  
必誠之忠孝勸學文武嘗謂汝稱思勗當心念其義父  
母名之欲汝三思而勗勵也故號公便習干戈漁獵書  
史致命伐罪擒叛獠於百越寫誠誓衆破狂蠻於五溪  
鬪子弟如使手足請風雷若應期契聖朝答高秩於驃  
騎酌大封於號畧豈非以辭第之懇忠成斷機之明訓  
臣節立矣君恩厚矣子孝成矣母慈著矣備此四者善

孰加焉抑神道祐心而人倫興行詩曰母氏聖善又曰  
宜爾子孫斯實潁川太君之有也享年若干開元九年  
四月八日薨於長安之翊善里先公早世丘墳故域古  
無合葬禮有從宜夫以體歸下地萬里豈殊乎黃壤魂  
何不之雙棺幸同於玄室以其年十一月十六日招魂  
祔葬於萬年縣龍首鄉神鹿里申孝子不忍隔親之情  
也恩勅賜錢十萬絹布皆百段日碑忠厚漢武知其母  
教馮勤寵貴世祖稱其母德克軫天情頗為連類號公

生盡其禮歿盡其哀嗟閱水之日逝懼藏山之夜徒追  
鏤碑板遠貽圖傳蒸蒸至意有足感人恻恻信言固無  
媿色銘曰

陳公舜後楊侯周裔去國何人南遷幾世鄴綠嶂表珠  
崖海際兩族相京財雄兵銳猗與邦媛儂茲國士友若  
琴瑟華如桃李心契法度容和愠喜資敬從夫移忠訓  
子嘉此令子南濱北歸于天鶴唳拔瀚鴻飛朱宮退敵  
銅柱來威國安家寵魚軒翟衣子封號國五公前字母

邑潁川二君舊土感激從慶踟躕今古高堂夜空弔客  
朝聚龍首山前前臨灞川招魂五嶺合葬三泉山山丘  
墓樹樹風烟孝碑不滅慈墳永傳

昭容上官氏碑銘

齊公叙  
不錄

天降時雨山川出雲乃生靈媛祚我聖君精微其道煥  
炳其文三光錯行昭容綱紀百揆繁會昭容條理外圖  
邦政內諗天子憂在進賢思求多士忠孝心感天焉報  
之吉凶有數丘焉禱之如彼九日昇焉暴之如彼三良



秦馬悼之漢宮選才班氏其特楚史書霸樊妹之力或  
穆齊公叙明其德嗟爾彤管是鑒是則

貞節君碣

神功元年十月乙丑陽鴻卒於雩都縣友人沛國朱敬  
則清河孟乾祚范陽盧禹等哀鴻抱德歿地繼體未識  
考行定謚葬於舊域鴻字季翔平恩人也其先著族右  
北郡大父真陽宰適茲樂土爰定我居維桑與梓既重  
世矣鴻個儻奇傑瓌瑋博達貫涉六籍百家之言其要

在霸王大畧竒正大旨君親大義忠孝大節而已章句  
之徒不之視也嘗陋漢書地理志周禮職方志時異虛  
記心不厭焉乃攀恒岱浮洞庭窺河源踐岷衡稽四海  
之風俗筭九州之險易與趙國貫高圖獻其議遇火焚  
盪天下壯其志而痛其事養徒閭里不應賓辟儀鳳中  
河北大使薛公舉鴻行勵貪鄙天子嘉之用寘于吏乃  
尉汲曲阿主簿龍門雱都夫其屏居十年一方化德歷  
佐四邑諸侯觀政惜乎有大才無貴仕命也初鴻遊太

學有書生山東李思言物故南館鴻傷其終遠家屬有  
喪無主乃躬駕柩車送歸東土及在曲阿敬業作難潤  
州籍鴻得人歷旬堅守城既陷而猶鬪力雖屈而蹈節  
寇義而脫之因偽加朝散大夫即署曲阿令鴻貞而不  
諛詭應求伸既入邑則焚服闋門而設拒矣故得殿邦  
奮旅一境賴存淮海底績答勲報功卒不言賞賞亦不  
及君子以為急友成哀高義也臨危抗節秉禮也矯寇  
違禍明智也保邑匿勲近仁也義以利物智以周身禮

以和衆仁以安人道有五常鴻擅其四武有七德鴻兼  
其二大慮克就之謂貞好兼自克之謂節粵若夫子可  
謚為貞節也已於是紀名垂迹表墓勒石其詞曰

倬良士縱自天辨方物覈山川厥志大哉峻剛節殷義  
聲返旅櫬晏窮城厥德邁哉哀斯人命莫贖德不朽温  
如玉軌來世哉

唐故處士河南元公之碣銘

其序子將作  
少監行冲撰

嗟我處士煥炳其文精微天象與道為隣積乎萬化于

三十春在惜薄葬時服幅巾厥孤克守永懷遷神君其  
心之無為返真乃建豐碣追揚茂塵王門公路豈微朱  
輪天才海學于何窶貧心焉有主孰知我艱烈烈皇考  
求仁得仁哀哀王母斯恩斯勤李虔報養王褒感親退  
居更命喪禮終身忠為令德孝實至純一門二善千載  
不泯

平偃師碑尾

粵以長壽二年十月十七日致窆於衛縣苑樓之西北

原夫令德所庥餘慶末也神龍紀歷皇運中興天子嚴  
祀清廟緬懷前哲乃下制曰朝議大夫守衛王府司馬  
上柱國平元春父故偃師令某公門襲慶士林成則名  
教羽儀道德泉藪輔仁冥昧早謝昌辰積善洋溢垂休  
茂胤時光祀夏慶屬配天錫類之恩俾單於卿士哀榮  
之典宜旌於泉路可贈蒲州長史君子謂成其子而植  
乎身義方也愛其臣而及其祖孝理也孝以行惠惠以  
察忠義以立慈慈以昭順君臣父子之是形焉

唐故涼州長史元君石柱銘并序

公諱仁惠字某河南洛陽人也昔帝軒命子爰宅幽都  
天神降祚遂荒北嶽其後日月運行雷雲經始壇場艱  
洛據天地之圖帶礪山河建王侯之國公魏昭成皇帝  
之十世孫中書令濮陽王順之曾孫也大父雄魏濮陽  
王改封武陵王昆吾伯嗣越在濮陽之墟瑯琊王子別  
封武陵之郡宇文朝降為武陵公太府卿秦州總管徵  
子去國不替舊章薛侯來朝於焉降等父胄隋濠豫二

州刺史右衛大將軍襲封武陵公翼亮隋室弘濟王業  
有佐命之元勳承異朝之世祿文武藉甚貽燕深長公  
受金行之正性承冠世之隆烈幼見岐嶷夙聞聲器靈  
臺雲秀繩墨之宰無施雅韻天成金石之師何力屬隋  
網弛紊神棄不歆卿族衣冠日失其序獨寐寤宿永懷  
槃澗之人藏器待時未射高墉之隼唐高祖龍飛天宇  
鶴版巖林授公右千牛授事營閉之恩舊也高皇邑子  
既與盧綰同衣世祖學徒則有嚴陵共宿久之以公事



免為嵩州法曹又歷循州河源滑州靈昌二縣令克已  
為政蠻貊化忠信之言直道與人仕已無喜愠之色永  
徽在歷石真構難羣兇既翦江界蕭條帝念疲氓疇茲  
俾又乃授睦州雉山縣令乘駟而往下車作則江浦海  
盜革面來威然後閒網鳩人峻策羈吏閒田盡闢鰥寡  
委犬彘之餘絕澗無遊豪猾屏蠶漁之氣我有禮樂達  
於山川鬼神物應休禎孚於鳥獸草木朝廷異之拜朝  
散大夫行隆州閬中令至改授雍州渭南令觀人設教

異邑同風遷隆州司馬尋加朝散大夫守涼州都督府  
長史分乘兩蕃人康頌作化澄巴濮無侵橘柚之園教  
溢河湟不飲蒲萄之酒離歌就是歲暮臨辰命躡修途  
榮慙厚德總章貳年終於官舍春秋七十有三夫人安  
定梁氏文伯之妻君子以為知禮孟軻之母良氏稱其  
能賢齊德茂於昭塗合祔期於幽隧有子懷貞斧藻詩  
禮佩踐義方承家有馥芝蘭如也歷官右司員外郎太  
子舍人而罹事徙居復歸舊土履霜露於三紀無改素

冠之行違桑梓於十載還守青門之田勤孝在乎追遠  
豐感思乎備物武陵公之塋域今順陵栢城之內也山  
園有禁奉瞻靡及粵以聖歷二年歲次月朔別卜宅於  
咸陽縣肺浮原合葬焉公孝友純深風標峻起門無雜  
客家有嚴君而佐郡為邦弘風邁德執法不撓去邪勿  
疑仲由之政事叔向之遺直豈稱論之典有闕範則之  
容將墜仰惟代姻恭承哀託躬有道之故事無媿蔡邕  
趙文子之將遊永懷隨會寓詞楹石式題賢壟其銘曰

大哉乾元我族資始有國伊魏曰天之子皇義姓風帝  
姬氏水創業垂統鬱乎舊史崇德象賢允也重軌貞涵  
玉性潤結琤源武公之子平王之孫川流長直光氣能  
渾孝深栢穎義重荆潘白珪比節黃金敵言行實剛簡  
遊無諂黷學妙神教書能鬼哭避彼屯運盤桓空谷四  
海有王一旦明目佩此芳草遷於喬木亦既從政淑問  
克宣秉心如水臨事如弦歷宰四邑高芬屬天元僚兩  
郡汪化流泉江河秦蜀嘉聲在焉三光西没百川東渡

天道運迴人隨代故倏忽三紀悲涼千露帝葬橋山傍  
孺祖墓天斷舊域地開新路路即咸陽阡惟京兆地氣  
雲矗長岡龍抱窳拵銅人塋留石鳥塵歇徑滅山飛海  
少篆刻揚名亭亭華表

張燕公集卷二十二

欽定四庫全書

張燕公集卷二十三

唐 張說 撰

墓誌銘

府君墓誌

府君諱隲字成隲姓張氏其先晉人也晉分家世相韓  
韓滅留侯為漢謀主至守為范陽太守因居其郡及華  
博物亞聖為晉司空君司空十二代孫也曾祖諱俊河

東從事大父諱弋字嵩之通道館學士考諱恪未仕即  
世先君四代早孤單門筑立宗祀之不絕如綫府君襁  
褁衰麻鞠育舅氏而炳太和之純嘏燦遠慶之洪胤庇  
身禮樂發言忠信小無不誠大無不慎終日乾乾遠於  
悔悵靈根顛而還植祖德墜而復振加以好學不倦聞  
一反三道機立鍵罔不幽探外王父大理丞某重世為  
士君傳其憲章博施精理年十九明法擢第解褐饒陽  
尉丁王母憂去職夫人少而守義老而無子因心創巨



事不忍言喪紀之數加人一等服常調長子尉換介休  
主簿洪洞丞太夫人在堂官求便近故累徙而不進也  
內清淨以化人外平反以悅親不樂歸美而善隱德故  
下車無赫赫之聲所去有餘愛之戀有命差覆囚山南  
輜軒所歷全濟甚衆君以律有違經背禮著妨難十九  
首書奏帝下有司而刪定之官黨同妬異竟寢其議道  
之將廢也與命也臧倉其如命何調露元年秋奉使晉  
陽遇疾輦歸藥禱無降冬十二月大漸九日乙卯棄背

於縣解春秋五十有二光珪說不天總角在疚明年春  
奉輶藁殯於河東賴夫人撫養孤藐躬加訓授男集文  
雅女工組繡姻不失親官復其舊景龍元年秋封樂縣  
太君夫人故藍田丞威之女也享年七十有三是歲十  
一月戊申傾背於東都康俗里第於戲哀哉靡瞻靡依  
何怙何恃二年七月己酉克葬我先公夫人合祔焉從  
周制也初議葬小子夢度景於萬安山南孤堆東峯之  
下時淮南弘公相地曰是山為華蓋岡為蟠龍龍者大

人之德孤者王侯之稱卜夢協兆何善如之乃定墳塋  
剏宅茲所小子銜恤誌之幽礎係曰

欽若古訓時惟皇考翕和三光希聖二老清有世業儉  
為世寶彌綸典憲思緝王道佐彼四邑人用不擾生我  
曷後棄我曷早閔余髻髮遭家不造鳴鳩在桑其子在  
棘母氏聖善示我顯德命服天朝封邑舊國榮未卒歲  
龍已匝域泣血思親昊天罔極孤之華蓋土龍蟠連岡  
四統帶林巒朝日吐耀遠峯攢微風夕發過蕙蘭石室

固護泉火寒衆靈幽謁奉神歡壽宮深靜永閒安

唐故左庶子贈幽州都督元府君墓誌銘

維開元十年正月己未庶子武陵公河南元公薨於東  
京留守之內館公諱景懷字某魏武陵王雄之曾孫右  
衛大將軍胄之孫贈廊麟州刺史仁惠之季子昔天啟  
水行君臨寰海雄圖長發本枝碩茂濟美象賢餘慶不  
隕公受茲介祉誕膺淑靈幼有純至之節長立公直之  
操學綜羣藝詞擅精微夫其結言以信導物以德清儉

足以軌俗真厲足以矯邪故美暢於中名揚於外弱冠  
以國子進士高第補相府典籤藩邸擇賢妙盡時選尋  
以內憂去職重補相府參軍及明兩昇儲作貞萬國以  
宮臣除太子舍人天授中以親累除名向逾一紀後除  
直羅溫縣二令雖大位未享通材必又自太府主簿累  
入副卿河南掾曹克昇亞尹握蘭右轄綱紀南宮秉茲  
憲簡肅彼專席再踐儲華卒踐宮相執心好直履法斷  
恩觸雷霆而除惡不避也枉絲髮而干譽不為也升

降雨宮出入三代克慎其始終厥有成君子以為難允  
哉其難矣及啟手歸全遺言薄葬家無長物士服其清  
年過懸輿人傷其夭嗚呼哀哉贈都督幽州諸軍事幽  
州刺史賻悼之節優於恒禮明年二月歸葬於咸陽之  
舊塋夫人韋氏祔焉禮也夫人即逍遙公敬遠之立孫  
中常侍希仲之叔妹淑行無徵華年早世其孤彥仲等  
克遵遺訓靡所寘哀說情睦外姻懷深國士既闕西階  
之奠遠投東武之詞銘曰

卓彼英運慶靈既長貽訓夫子體微知章在藝斯博於  
欲則少徒文其中莫飾其表惟靜惟默不激不矯時經  
三代官成兩宮化若風偃德如澤融邦稱其直朝哀其  
忠禮祔周兆墳瞻漢宮哀哀純孝長訴旻穹

周故通道館學士張府君墓誌

君諱弋字嵩之范陽方城人也其先張仲以孝友佐周  
子孫醜周仕晉相韓至留侯報韓離秦興劉滅項為漢  
世家九代及于漢亂居燕四葉為晉司空混一天下司

空生禕避胡過江六世至太常而復寓於河東之族人  
君即太常卿隆之曾孫徵君子犯之孫河東從事俊之  
子性倜儻尚氣節能引弓六鈞命中百步車服出入擬  
於封君州里頗惠之君迺勵操強學不出門者十餘年  
探道覩奧鬱為淵藪周武帝聞之徵為通道館學士既  
入隋而面其國高尚厥志終於山廬嘗言夷齊清者非  
達伯鸞曠者非中優哉游哉吾不與也夫人某氏少而  
嫠居長而喪子流離世故窮盡艱危提攜女姓托身禪



宇實有高行之烈隱居之風未遑歸葬有志不就遺恨  
終天降及曾孫追申情禮景龍三年歲次己酉十月十  
六日克葬曾王父曾王母於河東之普救原成先志也  
銘曰

皇矣烈祖才雄氣武不值漢高空思萬戶一旦折節十  
年學古高步華光飛纓書府昔有周處聃蛟契虎易暴  
以儒異代同矩周命既沒鼎遷於隋仕於二姓君子不  
為昭昭盛德百代之規

唐處士張府君墓誌

府君諱恪其先晉人晉有張老韓有開地漢有留侯八  
代孫皓為司空司空子宇為北平太守遭漢亂離家於  
范陽至立孫華復為晉司空遇難子孫南渡其處者或  
寓於蒲坂周齊間有歸者因從焉君晉司空十一代孫  
也曾祖徵君諱子犯祖河東郡從事諱俊父通道館學  
士諱弋德音遺範詳諸家謀君孤紹單門旁無兄弟苗  
而不秀未仕而卒道未融於邦國位未揚於王庭故老

之口寢遠好事之書又闕是後生不得預聞焉哀嗣子  
晉州洪洞丞隲襁褓衰麻育於舅氏夫人隴西董氏常  
州長史雄之女也早年守義惟鞠一子嚴而有檢勤而  
善訓成先人之丕烈貽後嗣之積善微太夫人德則張  
氏幾墜墜焉開耀元年十二月二十七日終於郟城縣  
世婦馮氏之別業春秋七十有二先君之違世也太夫  
人在堂大門在殯日月逾邁有志未從是諸孫疾焉若  
履淵谷以景龍三年歲次己酉冬十月二十六日克葬

王父王母於蒲坂東司空之村成先志也銘曰

綿綿王父續我靈基幼而植德人莫知之烈烈王母克  
明克類教成鬻子光我族嗣中條之北大河之東丘陵  
桑梓鬱鬱崇崇千年啟室百歲來同永惟先志欽成厥  
終

中書令逍遙公墓誌銘

唐故中書令逍遙公韋氏諱嗣立字延構京兆杜陵人  
也受渾元之正性挺生人之秀傑門為孝悌之府世處

台衡之地士林之高標宗臣之首出者也生於秦之清  
水長於鄭之成皋聰明先覺博古兼覽究蓬山之百氏  
綜闕里之六藝文而不華實而不滯原夫志在於易行  
在於禮守橐籥之沖虛播朱紘之愷悌事有則而言有  
度神無方而用無體其與人也溫良善誘仁恕多容俾  
夫頑蔽開哲復鷲擾從君子進道小人革慮聞者願來  
見者忘去若膏澤之浸陽和之感萬物莫知其化矣及  
夫覆篲登朝濫觴宰邑聖朝知其周慎恭肅簡易循良

是以綢繆兩禁重疊千里迄踐宰衡終厥有成凡化二  
邑理七郡三入中書再統兵部選兵吏各兩冬典樞密  
共五載光弼四主歷政三十有餘其間累有傍及官因  
左退日月蝕而更明隨和幽而不昧爾其為邦設教導  
德閑邪身勤心苦誠感物化禮讓興於私室刑罰廢於  
公家衡鏡高懸文武矯首才無我失善若已有風流名  
教作法垂後訃謨皇極功格天地茫茫蠢蠢既生既遂  
四夷來王五靈皆至然而外榮中素迹邇邇然朱戶

之若喪邈矣赤松之可接西宴驪山之谷東息龍池之  
野擇逍遙而建號列土宇而開社即明主封立帝之謀  
表高臣之志也公考侍中為國元謀公兄承慶當代齊  
名咸以令德繼和金鼎扶陽二相陳氏三君復追美矣  
侍中前夫人崔氏生黃門而即世後夫人王氏生公而  
偏愛公克諧以孝因心則友啟均養之德成無間之言  
天下之人比之祥覽惟公德行言語文學政事四者實  
總而兼之事親養志而能爭居喪過哀而顧禮此善中

之善者也善人天之經也國之寶也道將興廢木鐸之用有時命或推移蒼生之望恒在春秋六十邁疾陳郡還醫洛師開元七年九月二日薨於歸德里有贈贈兵部尚書謚曰某禮也明年某月葬於某地有子孚恒濟史儻然在疲靡所寘哀以某忝縉雲之舊寮清風之餘論入難名之閫域窺妙德之形容見托銘誌庶傳精爽至於歷次次序平居事業當見郡府遺愛之碑國史名臣之傳故不存焉銘曰



我我仁公抱孝含忠文獻則足高明有融翻飛王佐穆  
我清風道濟明時心樂幽地薜衣華袞坦然一致逍遙  
啟封帶礪傳祀生涯共盡振古其常人秉三德天歸百  
祥臧孫有後公業不亡

岐州刺史平泉男陸君墓誌

開元十三年十一月六日故岐州刺史平泉男陸公卒  
於京師十四年冬十月葬於鄴西之先塋公諱伯玉字  
某河南人識真之士也夫譽其克家光乎觀國篤慈惠

以宰邑宏雅量以執憲擅華妙於禮聞敷文敏於禁掖  
推直方以獨坐率簡易之專誠所至而美風振所莅而  
德聲溢充於我而美形乎外者焉若夫孝盡愛敬之衷  
悌包友順之節仁協返身之恕義適成物之和四者禮  
之善物與吾友嘗從事於斯矣然而舉禮之綱持心之  
柄靜則樂先王之道動則濟賢人之業位不盈量年無  
登壽之才也之命也復焉可言哉銘曰

陸侯泉妙體曠心古龍章炳文麟角藏武索篇冲用詩

書義府移孝則忠安親合主乃建侯社乃牧王畿有嚴  
有翼有長有威汲直謝病秦和不醫乞言未老啟手全  
歸石鼓東臨銅臺西望別業宛在舊塋增創弱子攀車  
孀妻送葬風景飄忽山川悵惆令德可傳浮生匪重神  
去一息形遺萬種露往草陳霜來樹拱一仁兮一義長  
蕪沒於丘壟

恒州刺史張府君墓誌

君諱承休字某吳郡吳人也留侯興漢播美西京長沙

徙吳蔽蔓東土曾祖冲在陳為文帝師入隋為漢王學士祖後肖授經太宗尊之以祭酒既封新野又贈以宗伯考少師位不充量止於朱陽宰班固稱世名忠孝魏武謂積善之家昌門一系暉我諸族君受天戩穀傳家業藝希言敦行去華重實非法不由非禮不動精於物理敏於政事初以南郊齋即補兗州兵曹丁太夫人憂廬墓三年加人一等再任始州司倉應八科舉改鄭州錄事參軍又舉賢良方正遷揚州司錄參軍移蘇州常

熟令歷政皆有能名加朝散大夫入為司農丞實掌錢  
穀姦僦息望使覆囚嶺南是司獄訟聽折惟允迴授濟  
源令風行畿甸河潤洛師加朝議大夫上柱國拜隆州  
司馬轉恒州長史簡而有享權而有中道嬰風恙去職  
就醫還京春秋六十有二終於頌政里夫人成紀郡君  
天水秦氏廬陵郡公行師之孫嗣公遊福之女敬事君  
子訓成諸孤當代之孟母也年六十二終於許州開元  
九年十月某日合葬於武功之禮讓原禮也夫道大難

合仕屯而不進德高有後身沒而福流君同生八人半  
服銀艾祚肩五子率為珪璋比迹於燉煌六龍南鄭千  
室德門濟美信有徵乎懼陵谷或遷乃勒銘沈石銘曰  
思文留侯時惟皇祖長沙南守分榦東土家有道書門  
傳學府蒐莪重世通經二主誕靈上哲克廣斯文造次  
仁義優游典墳孝乎事親忠乎事君猗那叔父亦足有  
云

馮潘州墓誌

公諱君衡字正平廣管高州人也昔畢萬苗裔邑於馮城因以為氏其適越者則袁宏過江錄所載長樂馮祖恩之後也遠居僻地代為右族帶甲千人擬四豪之公子田洞百里齊萬戶之封君祖盎持節總管高州都督耿國公葵贈左驍衛大將軍荊州大都督恩命分府為三州授君之三子子智幾高州刺史子智玳恩州刺史猶子子游播州刺史公荊門之孫恩州之子量包山海氣逸風雲陰德以濟物力行以求道散岸從心乘化而

沒斯實一方超邁全真之士也夫人南海郡太夫人麥氏誕嫗勳門作嬪傑室初執冀妻之禮終抗梁實之行即大將軍宿國猛公鐵杖之曾孫女也夫人有三子一女同歸上京長子元珪左衛中候次子元珪左領軍衛郎將少子力士右監門衛大將軍以將軍少養於高氏故舉家從其姓焉夫德厚者福長先否者終泰天之報應豈虛也哉大將軍所以雲漢奮飛忠孝至感迎聖善於炎海展三牲之色養拔友于於荒徼會四鳥之嚶鳴



搢紳美談簪紱傾慕是知敬仲羈旅將育於齊孟軻儒  
藝成名此母信瑰才之特達亦餘慶之助成乎夫人享  
年八十有七開元十七年五月十二日薨於西京來庭  
里粵以八月二十二日安厝於長樂原之新閩憫將軍  
之純至嘉先士之晦名恩詔追贈潘州刺史招魂而合  
葬焉蓋殊常之禮若夫慈以遺後孝以揚親忠能合聖  
惠足昭仁嗟乎馮氏之子具此四德鏤石垂文為不朽  
矣銘曰

潘州違世滅迹沈彩詔贈本邦光燦南海其孤永慕昊天不逮夫人處順奄背榮膺悲離兩鄉魂合雙櫬孝心可贈百年匪恡天日蒼蒼丘壟茫茫地名長樂人樂無長郭門之外愁生白楊

贈郎將葛君墓誌

公諱威德字某葛氏本梁國寧陵人也因遷徙今居京兆涇陽縣父寶未仕早世公室無陶白之資朝無金張之援不受過庭之訓不漸鼓篋之術而能奮飛喬木獨

拔深濟富忠孝而由已善射馭而聞天早以武藝妙選  
供奉每扈遊別館侍蹕禁林何嘗不左發五犯傍連雙  
兔歲久拜元城府左果毅都尉尋加上柱國入陪內仗  
思馬斯才出典外軍握兵之要所謂白珪特達青雲自  
致者也其用未展其生有涯神功二年某月日終於東  
都私第殯北邙之山夫人太原郡太夫人郭氏從夫有  
禮以子而貴開元八年十一月薨於京師之修真里有  
子福順克家用孝開國惟忠泣風樹之無追痛榮祿之

不逮哀戚之情上感飾終之澤下流窀穸有期祖奠將  
設有詔贈右驍衛郎將開元九年二月七日合葬於長  
安縣龍首鄉禮也鬱鬱宰樹蒼蒼墓田恐佳城之見日  
秘銘石於重泉詞曰

都尉武達夫人禮封令德高行譽偶名雙自古迄今仁  
賢同盡惟傳忠孝餘慶不泯

四門助教尹先生墓誌

先生諱守貞天水冀人蓋好學博古者也本乎官族稱

為尹氏昔有伊秩司周太史暨乃吉甫勤於宣王格言  
大勲布在書傳遠祖緯魏僕射曾祖欣隋開府大父珍  
唐棣州蒲臺令父文唐通州三岡令先生積德餘慶天  
錫純嘏愿而克恭情與禮合七歲誦二雅能通書契訓  
詁之義識草木鳥獸之名十五誦三禮能明君臣父子  
之道定郊廟吉凶之制二十誦春秋尚書能精五行九  
疇之數斷褒貶會盟之節二十五誦詩及易能辯政雅  
頌之始極變化生生之至又能誦古史百家之書善文

章草隸之則恥夫流俗背實嚮聲飾華褻末故每和外  
內厲元元本本學者如斯不舍晝夜垂拱四年以明經  
高第遂授大成自延載之後條限賓薦長安之初大開  
貢舉大功是歲千五百餘人召先生課數淑隱時稱無  
滯學矣天子聞其進通經術乃下制曰成均大成尹貞  
業隆時習功宣日就既有勵於分陰俾參榮於丈席可  
四門助教誥誥青衿有所仰矣長安二年六月十日晝  
寢忽夢麟臺兩局爭召修文覺而歎曰十二日稷吾當

往矣因命親族序訣至日安枕俟期俄然而卒春秋四十可謂古之知命達化者也嗚呼天與之德而不永其年天與之才而不大其位何乎粵七月十七日葬於高陽原先君之舊塋銘曰

尹氏之子其殆庶幾為仁由己三月不違謙成道柄學也身基辟雍洋洋可以療饑環林之下可以棲遲我實道貴人言位微修文地下前哲同歸子之知命將歿先期朝衣東首精魄高飛人之云亡胡不悽而高陽之原

有隄其側郭門直視松栢一色丘隴累累阡陌誰識浮  
焉休焉為我心惻

立州司戶上柱國尹君墓誌

公諱虔字某其先東平人也堯之太原始封呂侯周之  
太師實表齊國河西則霸王繼代關東則丞相聯華近  
徙河間是稱右族大父贊隋幽州都督府長史考師滄  
洲青池令並振羽儀馳聲郡邑公孝悌天至禮樂混成  
千里聞騏驥之才五都重琅玕之價壯士行去樹勲於



塞垣君子居之何陋於蕃郡以上柱國為立州司戶參  
軍積善襲於家風餘慶流於身後享年若干而卒夫人  
河清縣太君傅氏四德爰備六行聿修始則賓於冀妻  
終乃訓成孟母春秋若干而終開元十四年某月合葬  
於州城西南里之平原禮也我有令子急司馬於小山  
我有淑孫偶乘龍於大樹榮哀之事于茲畢矣銘曰

堂堂呂公休有令德穆穆傅母順我內則兩譽齊振雙  
儀不忒景行山東風流河北有生必謝誰能獨存神寧

故里合葬平原劔暗泉室松寒墓門勒銘沈礎萬古何

言

徐氏子墓誌

徐氏子者名巖字某司封員外郎堅之第四子也驥子  
睨雲鳳毛誥日孝友因性聰敏若神置在膝前已會星  
辰之氣戲於牀下能記賓主之詞及總角成童精意好  
學問一知十升堂觀奧下筆成章而倫要發言為論而  
卓詭識者咸謂增世構之崇蘊益源流之洪潤雖甘茂

之孫十二飛辯班彪之子九歲能文不尚之也天乎何  
辜顏傾無命年十有三歲大足九年九月遭疾而沒嗚  
呼哀哉凋月始生不見其盈瓊枝方秀不見其茂悲哉  
銘曰

生日何淺死路何深珠碎眇月花殘稚林哀哀父母孰  
處其心

鳳閣尹舍人墓誌銘

戔戔尹氏太古之始發源堯師中葉周卿爰暨初考咸

有頌聲猗與府君代烈增盛孝行之本謙德之柄耽樂  
道真含光無競三典郡土五刑以正再司府丞百工興  
詠茫茫大造物生遂性虛無宰之孰能力爭位不充德  
優游天命身沒道存同符孔聖是有才子克成餘慶

子曲阿令誌銘

存為神鑑歿為國殤惟呂惟子同歸義方

司屬主簿博陵崔訥妻劉氏墓誌

夫人劉氏其先彭城人也隋毗陵郡通守子將之曾孫

唐滁州刺史德祖之孫汾州刺史延嗣之女也昔武子  
處秦厥初令氏元王國楚是焉昌族盛德之門龍驥接  
彩世祿之胄龜虎聯華夫人璇室載蘭蕙林增秀喈喈  
黃鳥豔豔清明聞詩聞禮竊比諸生茂行淵心實稱士  
女及鳳飛啟絲夫婦盡琴瑟之和雞鳴咸纒舅姑移喬  
梓之敬友愛洽乎妯娌任恤周乎姻戚豈惟禮備澄幕  
工深機杼固已能循法度宜其室家矣年若干以大足  
元年七月某日寢疾而卒粵二十九日某辰假葬於某

里夫國喪賢嬪家亡淑媛母氏垂白殞奪所懷稚子始孩翦焉無倚嗚呼天道輔仁人道與順眷茲七德不遐三壽何哉報應之理豈神食其言修短之期將事歸於命外姻畢萃累歎不足夫人即吾姨也今薄謚素履永刊幽石圖史之外有美存焉其銘曰

崔實齊胄劉亦漢宗崇其顯媿望偶族雙閨闈是穆饋奠斯恭貞歌浮漢孝室洞江珪璋其節桃李其容宜享偕老胡寧鞠凶朝槿飛陌春蘿墜松夫傷子慕去此何

從百歲之後魂兮合封

張燕公集卷二十三



欽定四庫全書

張燕公集卷二十四

唐 張說 撰

墓誌銘

文昌左丞陸公墓誌銘

公諱元方字希仲蘇州吳縣人也帝典惟二虞盡美於南風強國有七齊莫大於東海元侯制食因而為宗丞相冊勲開吳佐命盛德之後瑤琨代襲故丹青奕世三

君之望並高金玉聯華五常之目齊重公即陳給事黃  
門侍郎琛之曾孫唐荊州當陽縣丞山仁之孫司儀郎  
東之之姪豫章尉立之之子體立黃之純粹峻清白之  
隆名鵬翼載軒騏鳴自遠始以司成明經業優擢第補  
三水扶風渭南三縣尉授裏行監察殿中三御史遷鳳  
閣舍人兼太子中舍又判鳳閣又守秋官行鸞臺三字  
侍郎同鳳閣鸞臺平章事坐公事降為綏州刺史居無  
何檢校春官又試天官二侍郎兼司衛卿復除鸞臺侍

郎同鳳閣鸞臺平章事轉右庶子轉文昌左丞前後掌  
選及知考各二歲九流銓總代天理物公執其衡鏡而  
野無遺賢三載考績惟王舊典公秩其幽明而庶官咸  
事斯並憲章臺閣藉甚人倫至於經紀大道彌綸庶務  
嘉猷削於隱德宏益晦於推美蓋不得而聞也古人有  
言進退在命忠信在人一出持州再入莅政汲長儒之  
方直時守外臺胡伯始之詳明亟司中禁抑有由焉嗚  
呼人之淑斯宜享難老昊天降戾曾不憖遺大定元年

二月七日寢疾而終春秋六十有三歷事兩宮三十餘載奉上惟敬臨下惟誠密勿兩終靜而調理心尚坦率不違名教之地迹列軒裳不雜風塵之伍施與忘倦鄉黨穆焉夷險若一朋友又焉所謂終溫且惠行同歸於大雅克己復禮身不離於令名及東首歸全西階撤奠無衣帛之妾無食粟之馬知與不知莫不嘉歎粵三月十四日歸葬于國門之南費村永刊昭烈垂之幽礎其銘曰

節愍太子妃楊氏墓誌

開元十有七

集作五

年十二月癸未中宗節愍太子妃楊

氏薨於京師太平里第之內寢越五月丙申詔葬於新

豐之細柳原黃陵不從古之道也嗚呼妃氏之先代居

河華赤泉啟國清白傳家東都之公胄西京之後族高

祖士達隋開府納言天授中以孝明高后

集作氏非

之父追

封鄭王贈太尉曾祖緘隋符璽郎抗節王充朝廷旌載

集作聖朝旌義

贈靈州刺史祖全節左內率贈魏州刺史考知

慶千牛豹韜二將軍若夫軒冕王官同許史之繁漢婚  
姻帝室比姜媯之宜周是故二華降靈五河飛譽拜玉  
冊於文廟儷金璽於青宮入參視膳之儀出友元真之

樂禮陪繭館祭服始於北郊詩贊鵲巢王化終於南國

豈知言

諫集

作遠鬪水神往邛

集

作山七日之望不歸千

秋之言何及於是視身知苦幽探白馬之偈覺心等空

坐證青蓮之葉久

以橋

集

作木無怙

栢舟早誓棣華

集

芎先落聖善相依闔門正家稱未亡而全禮高堂終養

不深哀而遂絕此又禮外之禮孝中之孝者也初上在東宮時妃有女弟選為良媛生忠王卜者曰不宜養爰

自襁褓命妃舉字

集作

及開元正位良媛為嬪而卒妃

之視忠王也隱觀之訓誨之竭從母之仁慈倍猶子之珍愛忠王之托妃也敬愛焉婉順焉生盡因心之樂歿過如母之感且夫慈懋鞠育孝思顧復仁叶恩親愛備恭睦成天下之百行致生人之五福斯蓋皇極之端國風之首者矣湖陽王當小宗之祭

集無此二字非

元妃之喪故

喪挾兩孤而祭殷二國何必鼓吹山上逢傳慈母之名  
石闕廟中獨立少姨之像史官承詔勒銘沈碧詞曰

太華北足長河東肘總粹陰靈妃德儲后鳴美玉佩炯

光金鈕貴嬪長姨寵王從母永訣上賓死孝哀親顧懷

孺子忍別天人昔貞萬國今撫百神泉燈我夜宮樹他

春陵

集作陸非

麥秀兮漸漸隴月生兮纖纖霸岸

集作元灑

去兮

無還日青門絕兮不

集作無

可瞻石獸澁

集作古

兮綠苔黏

宿草殘兮白露霑園寢閒兮脂粉膩不知何人兮開鏡



奩

滎陽夫人鄭氏墓誌銘

夫人諱某字某滎陽開封鄭氏之女也

集無也字

有唐銀青

光祿大夫行少詹事博陵侯

集作博陵

崔氏之妻中大夫

中書舍人湜之母也高祖述祖

集無祖字

北齊禮部尚書太

子太保滎陽平

集無平字

簡公曾祖武叔北齊洛州刺史中

牟公祖道援

集作

隋宋城令父世基故吉陽令故左僕

射安吉公杜淹太夫人之外王父也夫人家世德門母

氏鼎胄衣冠禮樂耳目所徵號之諸生實為女士先夫

人以崔出泰

集作太

岳之肩鄭祖周王之穆長源修麓北

濬聯宗

隸作

故夫人年十有七歸於我氏盡敬愛以安

舅姑致友穆

集作睦通用

以諧娣

如集作娣

性寬恕尚素雅文

而不奢約而不陋故邑號光啟象服是宜博陵侯更事

兩朝多歷官序居必大理去有遺愛雖毳衣善聽得非

雞鳴之弼乎舍人及三弟長安尉泌藍田尉液左千牛

滌咸有當代之名立

集作圭

無過之地滋液德教

集作訓

琢

磨禮範雖趨庭善稟得非聞

集作

門之誨乎夫樂得好

述關雎義也鞠成衆子鳴鳩仁也采蘋采藻修禮度也

如山如河有德容也婦禮既成內則用貞母儀乃行家

道以寧於是春秋高矣雅好真諦厭黻禪味減撤珍華

被服慈衣捐斥

集作

文繡總斯羣懿式是六姻故以嗣

徽先姑垂裕來史詩所謂邦之媛也夫人有焉皇天難

忱不享偕老年六十四神龍元年十一月九日遘疾終

於洛陽之遵化里其明年二月

集作

三月某日葬於富平縣

之某原君侯傷神諸子銜恤寘銘幽寘用存終古其詞

曰

東惟簷府西望綸闈吾夫鶚麟吾子鶴飛青綬赤第魚  
軒翟衣橋梓灌墓堂堂榮輝如何不淑奄永泉扉漠漠  
玄夜容容白日百歲之後同乎此室

右豹韜衛大將軍贈益州大都督汝陽公獨孤

公燕郡夫人李氏墓誌銘

夫人諱某字某故代州東治府右勇敢都尉幽州高士

李感之女也本姓張居於清河郡大父元哲集作普非官至

安東大都護長史與太宗有故賜姓李氏仕歷煇州司

馬始家薊城是則帝寵舊臣乃命王族官平朔野因為

郡人偉哉孝友清白之仁基金鈎石印之靈慶集作非必

將光大別族集作業繁衍淑女彩黛粉敷焜燿華暄若斯

之盛也夫人幼而韶異長而婉穆金聲玉澤舜榮菊茂

傳賢莊姜詩美仲氏無以尚也初汝陽公夫人元氏生

一男四子而卒繼室以夫人封諸燕郡王元生集無立生字

及長孫楊氏二女秉螽斯宜爾之德著鳴鳩均養之仁色無偏和心無殊厚閨庭之內邕邕如也雖邑中五服之家門下三年集作千之客莫能察其異焉永寧里先人

之舊廬也有通渠轉池巨石欽嶷噴險集作陰淙澗洄潭

沈沈殊聲異狀而為形勝游衍之處者十四五前夫人

之孫蘇氏之婦弱集有冠字非歲嬉而墮焉舉家環流憚莫

能救夫人投身赴水或沈或浮久之提挈僅免其行已

也實多此類府君更郎將中郎將各一將軍大軍將凡

四前後領左右羽林二軍禁營青海鴨綠二道總管夫

子元老白首兵欄腹心爪牙朝無與二外受琬戈文馬

之賞集作內委金璣寶貝之飾將軍既頒於部曲夫人

亦散于宗姻可謂貴而好禮富而能惠者已及君子晨

歌夫人晝哭喪有過戚集作制無越禮其後法吏苛禮

集作余子遠遷窮荒一訣倚閭集作三歲炎山瘴海曷

云其來施珍玩以奉佛徹滋味以奉道精意入冥明神

與直中興昌歷無廢舊勲先公茂乎飭終愛子榮乎起

滯天步方秦家屯適夷宜享南山之壽奄頓西泉之駕  
神龍元年十二月二日寢疾終於洛陽之德懋里春秋

若干國墜邦媛宗

集作家

傾母儀孤盾孝孫哀哀樂棘有

詔旨曰獨孤某妻亡還京日宜給靈輿并遞悼舊褒德

塲作於孤恤喪朝之大經者粵以明年十一月二十日

卜葬於

集無於字

雍州之某原不從先塋古之道也夫計功

伐勒曷彛非婦人之事撰德行存國史亦孝子之志乃

為銘曰



倚嗟昌兮月出之光如葉莫莫如華皇皇宜啟燕郡作  
合汝陽尊之象服錦衣裝裳以慈行訓曰仁之綱以命  
易難曰易之方婦有柔德曰惟其常女之士行于何是  
不集作臧彼天蒼蒼胡降百殃捨我媚子捐其高堂丘隴  
芒芒集作風生白楊象物皆盡德音不忘

上邽縣君李氏墓誌

夫人太祖景皇帝之玄孫而平郡一作原王普定之女也

賦靈陰德資性柔嘉事舅姑盡其敬與娣姒致其睦茂

行充乎內則懿聲滋於外姻雖王家長自傅保而能謙  
光庶類降心細物手成朝祭之服躬揉酒食之品凡婦  
人之所能事而夫人莫不備焉府君朱紱之歲也於是  
乎始受封邑象服盈門魚軒在路姬氏王者之後夫人  
帝室之親夫貴婦榮於斯為盛及帷堂而哭有敬姜之  
禮擇隣而處有孟母之教入閭侯信有諸婦之期出言  
成章有衆女之誠受命不淑以某年月日卒於同州之  
私第以神龍元年十一月二十日合葬於萬年縣白鹿

之舊瑩有子懋殿中侍御史檢身承家揚名為孝思我  
母氏感秦伯之詩祈于府君取周公之禮髣髴心迹誌  
之幽石其銘曰

茫茫萬姓朝宗於李婺星分極咸池派水后稷裔孫神  
貽女士動遵法度居觀圖史輔佐哲夫訓成賢子宜崇  
徽號以享介祉高堂奄空霜露方始儉用禮節葬非奢  
美鏡下窆臺衣珍泉筍壠烟不長一作散松風長起摘果  
人迷侵陵獸死永言惟孝事親終矣

鄧國夫人墓誌銘

詩美莊周傳稱孟母庶姬綿邈千載時有猗嗟邦媛柔  
明亶厚龜玉毀積膏蘭夭壽遠矣皇祖肇自宗伯靈基  
在晉華胄陵江尹茲西楚宅是南邦高蓋結轍圓冠比

踪魏館虛待周京長發父對雄風母膺姊嫌作月珠浦

瀆集作

驥

潤玉林清越昆弟三人羽儀雙闕家芳集作淑

女國茂賢妃具瞻四德旁通八徽步幃馳辨連環定機

調絃魚躍弄杼鴛飛媪后集作氏創業軒宮多事高行登

聞大家入侍幽贊日月財成天地温室不傳平城盡秘

大君命我變禮斷恩衛妻空誓息媯集作婦無言均養七

子劬勞二門始賦樛木終歌采蘋多難啟聖羣凶構孽

明曠作家作仇脅權相滅臨禍不懼忘生蹈節彼何人

斯碎此貞烈氣消日朗既安且平皇心震悼禮備哀榮

啟國加等復土陳兵外姻來唁中使臨塋恭惟夫人宿

精知集作智刃昭昭開士授之心印古無合葬遺言別墳

樂樂孝子敢廢前聞服不珍繡盤無膩薰室暗泉火松

殘隴

集作

雲神合大化誰為小君

李氏張夫人墓誌

臨淄李伯魚妻者范陽張氏女諱德性孝悌柔婉能日

誦數千言習禮明詩達音妙續

集作

德言容工蓋出人

也伯魚天下善為文擢校書郎出為青州司戶而卒夫

人寡居無子以歸宗焉長安二年四十有八傾逝於康

俗里殯於永通門外景龍三年家疫居貧季弟君

集作說

鬻詞取給冬十月安厝伯姊於萬安山陽蒼梧不從古

之制也北望先隴

隴集作

西接抃

集作

丘明靈其嘉永安

此室銜哀叙誌嗚呼孔懷銘曰

送送

集作

伯姊萬安之墳精靈何處為雨為雲彼臨淄

兮千里望倏忽兮夫君

### 張氏女墓誌

女郎名琰姓張氏洪洞丞府君之少女也聰慧孝友蘇

條鬚皙

集作

能讀史書善奏絲桐舉族稱

集無

珍之未

集無

成人而天命也聖歷中隨仲昆

集有

任殞折

集無

於慶州歸殯於藍田別業景龍年屬家艱季兄君

集作說

徵黃門侍郎哀請不拜詔許終服家貧傭文以取資

集作

給葬十月獲改

集無改字

葬女弟於萬安山陽差池姊塋顧

瞻尊闕不亡孝弟慰爾幽魂含酸屬銘投筆氣索辭

集作銘

曰

陟彼京兮痛同生兮奈何朝露在舜榮兮共天地之大

德焉早落而無成兮

張燕公集卷二十四



欽定四庫全書

張燕公集卷二十五

唐 張說 撰

行狀 弔文 祭文

兵部尚書國公贈少保郭公行狀

公名震字元振本太原陽曲人也大父任相州湯陰令  
因居於魏公少儻廓落有大志儀冠雄傑身長七尺  
美鬚髯十六入太學與薛稷趙彥昭同業時有家僕至

寄錢四百千以為學糧忽有一人縗服叩門云五世未  
葬棺柩各在一方今欲齊舉大事苦乏資用聞君家信  
至頗能相濟否不問姓名以車載去一無所留深為趙  
薛所誚公恬然曰濟彼大事亦何誚焉十八擢進士第  
其年判入高等時輩皆以校書正字為榮公獨請外官  
授梓州通泉尉至縣落拓不拘小節嘗鑄錢掠良人財  
以濟四方海內同聲合氣有至千萬者則天聞其名驛  
徵引見語至夜甚竒之問蜀州之跡對而不隱令錄舊

文乃上古劒歌其詞曰君不見昆吾鐵冶飛炎烟紅光

紫氣俱赫然良工煅煉凡幾日文粹鑄得寶劒名龍泉

龍泉顏色如霜雪良工咨嗟歎竒絕琉璃玉匣吐蓮花

錯鏤金環生明月正逢天下無風塵幸且得粹周防君

子身精光黯黯青蛇色文章片片綠龜鱗非直結交遊

俠子亦曾親近英雄人那知文粹作中路遭棄捐零落

漂淪古獄邊雖則文粹沈埋無所用猶能夜夜氣衝天

則天覽而佳之令寫數十本遍賜學一作士李嶠閩朝

隱等遂授右武衛曹曹右控鶴內供奉尋遷奉宸監丞  
屬吐蕃請和親令報命至境上與贊普相見宣國威命  
責其翻覆長揖不拜瞋目視之贊普曰漢使多矣無如  
公之誠信遠近疆界立談悉定因遺金數十斤而還公  
悉以進上奏言揣彼上下之情人倦其絲役久矣咸願  
早和大將論欽陵不爭四鎮獨不欲耳但國家每歲不  
絕其使而欽陵常不稟命自然彼落唐書作蕃之人怨欽陵  
日深望國恩日甚設欲廣舉兵徒難矣斯乃反間之微

旨也必可使其上下俱懷猜阻矣則天甚然之無何吐蕃君臣果相疑貳遂誅欽陵弟贊婆及其兄子莽布支並來降公聲名藉甚授御史加朝散大夫遷主客郎中吐蕃與突厥連和大入西河破數十城圍逼涼州節度出城戰歿蹂禾稼米斗萬錢則天方御洛城門酺宴涼州使至因輟樂拜公為涼州都督兼隴右諸軍大使調秦中五萬人號五十萬以赴河西公至涼州吐蕃素聞威名相謂曰我贊普猶懼吾輩何可敵乎相率而去公

收合餘衆繕修城壁施法令屯田一年而復公之功也  
公以涼州西拒吐蕃北有突厥久示其弱未揚天威因  
徵隴右兵馬一百二十萬號二百萬集於湟州營幕千  
里舉鋒號令時宗楚客為相素與公不協令人告變則  
天惶懼計無所出狄仁傑魏元忠韋安石李嶠宋璟姚  
崇趙彥昭韋嗣立張說二十五人抗表請保如公有異  
圖並請身死籍沒則天由是稍安兵既大集人又知教  
分兵十道齊進過青海幾至贊普牙帳普屈膝請和

獻馬三千疋金三萬斤牛羊不可勝數公大張軍威受  
其蕃禮而還既伏西戎震威北狄突厥獻馬二千疋所  
獲涼州人士皆放歸塞上從此蕃鎮肅清蕃落畏慕令  
行禁止道不拾遺凡所制作規模率為後法河西隴右  
十餘處置生祠堂立碑頌德闔立均等為其文尋有詔  
許入朝公素無第宅寄居友人之舍候鼓入朝忽有人  
馬前送狀開緘前人已去狀中惟有物數而無姓名便  
於樹下獲驃馬二十餘疋帛三千疋公曰豈非太學請

葬之士乎因以買宅居止薛稷趙彥昭聞之皆嗟歎良久景龍年中宗夢客韋處訥等潛結朋黨爭功害能授公駝騎大將軍兼安西大都護四鎮經畧使金山道大總管時烏質勒久恃衆倨傲不屈朝廷縱兵遠掠道路不通公以衆寡不敵難以力制因率麾下數十騎徑入部落烏質勒大出兵衛出迎望見公威容端毅風鬣若神不覺屈膝因而下拜公宣國威命抗聲與語自朝至暮雪深尺餘竟不移足質勒頻拜伏語畢歸帳相去二十



餘里質勒久立雪中倉卒疾發是夜暴卒其嗣子婆葛  
集諸將曰漢使殺我君父今須復讎大舉兵衆將追殺  
公聞質勒死遲明素服來弔道路相逢兵圍數匝婆葛  
見公忽來未之敢逼但言衛護漢使公至其帳下大哭  
流涕因撫定其嗣蕃人大喜留數十日助其葬事婆葛  
獻馬三千疋牛羊十餘萬移居千里西域無事道路肅  
清諸蕃聞之遣使歸降者十餘國時人語之曰郭元振  
詭殺烏質勒知婆葛與闕噉有釁奏請移於瓜州制從

之會中書令宗楚客受金遂寢其事公具以狀聞楚客恃勢囑請召公將陷之公不從又請斬楚客清蕃落時韋庶人竊弄國權中宗竟不之省也初安西南有毒河遠在葱嶺西北河岸百步人畜踏之者輒死公威振西城所向無不從者因驗圖經知其源率兵三萬人歷于闐康居大食等十餘國所過之國令供資糧仍署其國主為左右總管率兵前進北至葱嶺牙帳前十二國王兵百萬餘其河源上有大樹高千餘尺垂蔭數頃大軍

至日有黃龍繞樹以口吐毒氣而拒官軍三軍悉覩焉  
公手書操檄文令左拾遺張宣抗聲讀之畢黃龍解樹  
而下公率諸軍誅之數日方倒聚而焚焉河源且絕數  
十里內悉為良田在安西十餘年四鎮寧靜韋庶人知  
政屢徵不至因下偽詔令侍御史呂守素中丞馮家賓  
相繼巡邊欲將害之未及皆為婆葛等諸蕃劫殺之睿  
宗即位徵拜太僕卿勅至之日舉家進發安西士庶諸  
蕃酋長號哭數百里或擗面耳抗表請留因給之而後

即路其至玉門關也去涼州八百里河西諸州百姓蕃  
部落聞公之至貧者攜壺漿富者設供帳聯綿七百里  
不絕公旌節下玉門關百姓望之宛轉叫呼聲動巖谷  
自朝至暮傳呼至涼州涼州城中男女在衢路並歌舞  
出城咸言吾父至矣通夜城門不受禁制都督司馬逸  
客聞之謂公近矣陳兵出迎會候騎至云始入玉門關  
都督嗟歎良久具狀聞至京同中書門下三品加銀青  
光祿大夫遷兵

唐書  
作吏

部尚書封館陶縣男依舊知政事

尋轉吏部尚書知舉選囑請不行大收草澤睿宗屢下  
詔褒美後默啜大寇邊拜刑部尚書充朔方道行軍大  
總管築豐安定遠等城以拒賊路尋加金紫光祿大夫  
再遷兵部尚書知政事仍舊元帥會太平公主竇懷貞  
潛結兇黨謀廢皇帝睿宗猶豫不決諸相皆阿諛順旨  
惟公廷爭不受詔不舉兵諸竇懷貞等宮城大亂睿宗  
步肅章門觀變諸相皆竄外省公獨登奉天門樓躬侍  
睿宗聞東宮兵至將欲投於樓下公親扶聖躬敦勸乃

止及上即位宿中書十四日獨知政事因下詔曰大臣  
立事夷險不一良相升朝安危所繫兵部尚書同中書  
門下三品上柱國館陶縣開國伯元振偉才生代宏量  
匡時經綸文武今之王佐出入將相古之人傑夙侍宸  
展疇咨廟堂思致堯舜以期管樂朕往儲闈洎登寶位  
每觀其仗義感激願制凶邪立誠慷慨密陳宏益爾其  
至矣朕實嘉之頃者梟獍生謀干戈作釁太上皇帝既  
命朕除討元振又馳奉宸極始則齋予為弼終則寧朕

問安可謂格於皇天貫於白日元惡既翦庶物惟新克  
昌是圖朕豈忘舊宜開井邑永誓山河可進封代國公  
賜實封四百戶物一千段子五品官尋兼御史大夫天  
下行軍大元帥是歲大徵兵衆閱武驪山兵一百萬號  
三百萬並奉公節度是日三令之後上將親鼓公慮有  
大變畧行禮上怒引左纛下紫微令張說犯鱗而諫曰  
乃曰元振有保護大功宜寬軍法流新州未至屬開元  
元年冊尊號赦曰元振往立大功保護于朕頃因閱武

頗失軍容責情放逐將收后效可饒州司馬未至卒於道時年五十八有集二十二卷文章有逸氣為世所重公少負氣縱橫遺意磊落作尉巴中不修名檢及登朝受任屢使遐方霜明烈心玉立貞節言行忠正居處儉約飭體雜於皇王致君期于堯舜公務之暇手不釋卷雖子弟家人未嘗見其喜怒前後上事切諫得失十數道俱焚其稿不以語人故朝廷莫知也睿宗嘗曰元振正直齊於宋璟政理逾於姚崇其英謀宏亮過之矣舊



於宣陽里居二十餘年不至諸院馬廐每朝迴對二親  
言笑歸室儼如也不問家事與狄仁傑朱敬則魏元忠  
李嶠韋安石趙彥昭韋嗣立薛稷張說等為忘年之友  
事父母孝聞父受授濟州刺史後以為相奏請解職授  
銀青光祿大夫濟州刺史致仕公歿後二親猶在自我  
唐授命宰臣有二親者惟此而已

弔陳司馬書

正月癸亥孤子范陽張說頓首頓首陳君之靈頓伏首

蓋遠辱慰疏執對號慟次於展洩來使未還傳君遇禍  
盡哀寢外傷心痛骨明府兄毓德南邦飛聲中夏急人  
之急憂人之憂勇於履危果於從政入使天朝有專對  
之美按俗交州見澄清之節故得振衣衡管割錦閩鄉  
越嶠舊風人徂輕剽揆之以淳俗格之以華章矯枉過  
正斯害也已齒由剛折膏為明銷嗚呼陳君婞直而殞  
皇天輔德問之何故疇昔炎德契濶周旋義則友朋恩  
結兄弟方期歲暮煜煜相榮玄髮未華何圖零落山濤

猶在愁紹不孤逝者有知當昭是意今返防關力報前  
書幽明雖異交友無改悲言下筆涕泗從之并往千錢  
俾陳奠酌獻歎萬里哀哉奈何說頓首再拜

弔國殤文

北伐兮東胡邈遼陽兮孤竹偏師兮覆衆在崇山兮峽  
谷露芘芘兮蔓草風蓊蓊兮拱木見馬血兮夜燃聞殤  
鬼兮雨哭君王按金鼓而氣憤撫珠鈴而淚滋橫萬里  
兮抽恨弔羣山而寫悲懟凶將兮我辱悼勇夫之秋纍

彼前鑒兮未遠何後來者不追對死地兮出陣臨傷門  
兮用師軍奪帥兮虹食壘車脫輻兮火焚旗有樂鷹兮  
愼矣無范宣兮愧之命窮進兮短兵錯膚鈍刃兮血染  
鏑旅殘潰兮棄組練山猶號兮谷餘戰殪原野兮奈何  
違君親兮不見於戲何天命之奄忽俾仁義之治兵為  
蠻夷之俘骨駮六校之飛將闐五營之勁卒吾見出兮  
不歸噫名存兮身歿

奉勅赤帝壇祈雨文

維開元十年歲次壬戌四月壬申朔十四日乙酉曾臣  
侍中源乾曜中書令張嘉貞兵部尚書張說謹以清酌  
昭告於赤帝自冬涉春至茲夏首宿麥將秀時雨未洽  
皇帝降服減膳避正廢懸恐害染盛是憂黎庶仁旨之  
勤已極兆人之感未通何辜于天而此不惠曾臣乾曜  
等同力聖日無敢怠荒薄才牝政多所不及神則不雨  
或此之由內訟懼惶莫知啟處曾臣等若上無補衮下  
不利人妨功害能負恩竊位惟神臨照簡擇其心降禍

厥身墜祿損命三臣當咎足謝天責萬姓何辜俾失農  
望今因夏享展禮既終上抒聖衷懇祈人命至誠必感  
佇流嘉液旨酒獻誠神其尚饗

祭城隍文

維大唐開元五年歲次丁巳四月庚午朔二十日己丑  
荊州大都督府長史上柱國燕國公張說謹以清酌之  
奠昭告於城隍之神山澤以通氣為靈城隍以積陰為  
德致和產物助天育人人之仰恩是關祀典恭承朝命

網紀南邦式崇薦禮以展勤敬庶降福四眚登我百穀  
猛獸不搏毒蟲不噬精誠或通昭鑒非遠尚饗

崇城門文

維開元五年荊州大都督府長史上柱國燕國公張說  
謹遣議郎行錄事參軍皇甫嶧敢昭告於大府城門天  
有三光地有五行陰陽順序庶物以生霖雨過旬晦昧  
不晴奈何以陰賊陽以蒙蔽明恐害嘉穀無奉梁成羅  
爾崇墉本人所營積陰攸處德在助成苟人是利亦神

之臧速收雲雨以復天常報爾時豚薦爾馨香謹以清酌脯醢式陳祭事尚饗

祭江祈晴文

滔滔大江南國之紀協靈通氣降福禦災是載方冊代存祀典歲惟季秋苗稼大熟霖雨偃集農夫未收油油秔稻垂生芽孽上則神威將廢下則人心何仰公私憂窘靡禱不周訴爾明靈撤此雲雨欽儲牲幣俟荅神休謹以脯醢敬崇裡請



賽江文

年月日朔具官某敢昭告于大江之神王有百谷禮尊  
四瀆善利惟神朝宗作賓發源岐山駕福來臻率此荆  
土明靈是主已成嘉穀垂敗霖雨聽我虔祈福我農畝  
既曠既獲既場既庾欣欣衆心願答神祐潔牲明酌寅  
奠江浦

祭殷仲堪羊叔子文

府城中西北隅舊有殷仲堪祠某到官廣其堂立羊叔

子廟像成而祭之

維年月日燕國公某敢告晉羊殷二荆州之神我聞立  
人之道曰仁與義仁者孝之先義者忠之主殷公為孝  
子羊公為忠臣行植晉國德施荆人不孤其美是建為  
隣雙風雖舊二廟維新凡百君子高山仰止馨香以時  
敬恭明祀尚饗

祭霍山文

長安二年月日皇帝使并州道大行軍副大總管尹元

凱等敬薦酒脯時果敢告霍山之神皇帝天覆萬物各  
遂其性祠於羣神罔不咸秩獨彼凶虜默啜悖天虐人  
窺邊猾夏畧無寧歲皇帝哀此黎獻勤於征役憫彼夷  
落毒於昏暴常欲誅其魁首哀是藩吐寇虐盈稔神人  
同棄今自送死并朔近驚山陵命將出師冀行天罰惟  
神炳靈參野作鎮冀方歆是正直贊揚威武俾胡馬化  
為沙蟲王師衆於草木獻捷之日昭報神休尚饗

祭崔侍郎文

維神龍三年月日兵部郎中員外曹良史等謹以清酌  
少牢之奠敬祭故侍郎崔公之靈位以行成名以才起  
天臨明代是生君子長戟高門層堂峻址友孝仁愛衣  
冠標軌清通正直省閣條理束帶立朝惟國之俊抑揚  
吐納金聲玉振器不滯方神無留韻厚奉外不為假坦  
率內不違真汎交而容博好施而能均欲人規已恕已  
及人故者不遺其故親者無失其親歷否泰能全其節  
故令名不離其身方齊六相助明三辰何孤我德何負

茲神搏空落羽中駕推輪昔時寮列今為弔賓凡二三  
子夙承遊眷聯務七兵歲陽三變分與時積事由更練  
蹇蹇公庭申申私宴慟音徽之奄永感舊範之不再戢  
容止於綴足潛眉目於蒙面哀哉奈何涕零如霰緬惟  
初疾以迄將亡意氣精爽乾乾自強顧瞻賓客勉勉矜  
莊几不側弁衾無解裳話言靜密憂公不忘猶看駿馬  
尚聽明倡靡神不禱靡樂不嘗脩焉信宿俄歸渺茫歲  
初置酒春中酌觴何吉凶之共域同歌哭於此堂自古

及今人誰不歿豈歎生死所嗟倉卒修途未半壯志先  
伐筑子亂年遺脣數月在親親與懷舊孰不傷心而痛  
骨虐奠易收深悲難歇尚饗

為河內王作祭陸冀州文

維萬歲通天元年月朔日神兵道大總管河北道按撫  
使右金吾衛大將軍河內郡王以少宰之奠致祭故冀  
州刺史陸君之靈戎羯不道侵軼幽都凶渠殄滅餘燎  
星鋪鳴弓扶柳飲馬長蘆攬集同惡難起無虞梟獍為

旅鯨鯢有族裳旗未兵剡荻弦木叛換吞噬睚眦觸逐  
亂舞梯衝潛攻版築鑿齒爭厲熊蹯未熟踰垣自潰守  
陴皆哭高扃已陷連樓復焚人類雜草城隨壞雲僵屍  
暴骨藉藉紛紛嗟嗟使君死節無恡政寬成俗兵機不  
振狡爾猖狂難以德鎮城為讎保身膏虜刃明明上帝  
仁覆憫下赫赫神兵驅馳在野朝告夕起如何不及將  
守非堅為寇是急救兵適來涉血猶濕三軍雷歎百城  
雨泣天子命我董戎冀方旌旗介冑千里相望既掃氛

濁言巡戰場輯穆入吏撫寧孤孀徘徊城府悽愴甘棠  
禮重王事哀深國殤魂兮有感歆此嘉嘗

為魏元忠作祭石嶺戰亡兵士文

維長安二年月朔日勅并州道行軍大總管兼宣勞使  
左肅政御史大夫同鳳閣鸞臺三品兼知并州事魏元  
忠遣裴思益以酒脯時果之奠致祭於石嶺戰亡兵士  
之靈戎羯慢天南牧吠主石嶺橫地北都局戶與我王  
卒保界并土如何不弔罹此寇虜列鎮既嚴連巖既削



攻則路險守非城惡彼謀匪臧實愆偕作援絕兵減軍  
孤勢弱地拒兩陁山望雙嶢胡塵大起白刃交錯石盡  
矢窮旗焚曹落嗟爾戰夫烈烈忠勇奮不顧命志無旋  
踵身歿名揚生輕義重天子命我理兵晉陽思與士衆  
底寧遐荒痛此壯士翦為國殤盍訴天帝降厲鬼方助  
氣金鼓復怨沙場虜血爾酌虜醢爾嘗封尸死所招魂  
故鄉尚饗

為魏元忠作祭石嶺沒陷士女文

維長安二年月朔日勅并州道行軍大總管兼宣勞使  
左肅政同鳳閣鸞臺三品兼知并州事遣裴思益以酒  
脯時果之奠致祭石嶺死喪百姓之靈北胡自擅賊虐  
不道氣悍朔風馬肥秋草侵軼郡縣驚逼稚老奔走山  
林是障是保兵不善守將不遠謀如何滅竈無復燒牛  
俾爾士女燔於寇讎魂飛狄刃血迸氈裘殤悲雨哭氣  
怨天愁總兵帝鄉言念北阜抗憤戎漠傷心按部泣吊  
郊童哀問田叟為爾復惡誓滅羣醜蹴踏蘭山脂膏葦

藪誠若克就歿亦不朽慰爾衆靈酌此簞酒尚饗

為人作祭弟文

維景龍元年月日朔從兄兵部尚書某以清齋少牢之奠致祭於故將軍弟之靈欽若貽宴俾降戩穀神祚玉衣大門金屋綿系溢寵諸宗橫福覩交泰之二儀承序殷之九族引同本於條貫合分流於昭穆義有感而意深恩無方而情篤況且山慕喬頂林晞秀木深仁遠愛俟子能復何從才之有餘而輔德之不足舉朝野而皆

痛在密愛而尤酷嗚呼哀哉永懷令弟言念生平蘭華  
雪豔玉潤珠清禮樂懸解文章挺生三篋暗記千門畫  
成風流望美月旦傾聲掌北軍之師律首東觀之詞林  
偉壯夫之獻頌善仁者之論兵賸新豐而臨幸遶湯井而  
連營那奉車之暴逝忽復綏而凶行軫天悲於宸掖固  
聚族於華京惠連詩夢子敬琴情儻昭昭之不泯知親  
親之素誠嗚呼哀哉尚饗

為人作祭弟文

維年月日兄某致祭亡弟尚書之靈天實喪子不憚遺  
善家殞玉樹國墜寶臣嗚呼執柔何痛之甚嗟予與爾  
夙遭閔凶哀惻相鞠殆及長成爾性岐實穎德表宣慈  
居盡友悌之心言必忠貞之事綿綿我族俟子而大奉  
祖德之令圖荷朝戚之惠渥白首相對紫綬相紆爾既  
秉國鈞既敷朝典出牧千里入宰六官予聞爾言嘗識  
過寵余嘉爾行在貴能卑清淨溫恭每希於上士飲食  
車馬不越於平人每思與爾歸印東都懸輿故里揚名

講德居常待終嘗謂老夫沒於汝手不圖令弟殞自我  
先及爾纏疴屬予伏枕不見數日長悲九泉嗚呼刊述  
未成平生已盡髮膚猶在魂魄焉知聞爾屬續之辰託  
予身外之事薄葬之禮還從爾心字孤之情不待遺意  
所恨在疾不視於喪不臨沈綿苦懷纏迫斯甚予羸老  
矣傷心幾何人琴兩亡命也命也

為鄭虛已作祭舅文

維年月日外生虛已謹以清酌少牢之奠敬祭于故汴

州司馬四舅之靈疊結周親天禍外氏仁舅捐館靈輶  
祖庭四海喪其範儀九族失其陰潤感今循昔觸緒增  
悲恭惟先門逮舅平日淵流莫逆道術同歸穆齊鄭之  
累姻深言孫之至友及鞠凶之際創巨失圖賜厚獲葬  
之恩事優含哺之育顧省全立功歸撫惠竊荷濟於百  
罹思效過於一等豈期德素積而力莫疇願未申而禍  
先集不孤之記緬爾何依猶父之心忽焉罔報冥昧靡  
覲存亡永違執饋奉酌五性含塞幽靈昭察當歆夙誠

祭和靜縣主文

維年月朔日敬祭薛氏太夫人和靜縣主之靈惟夫人  
軒庭繁祉羸臺茂淑承訓公宮宜家卿族博士學藝尚  
書題目法度蘋繁儀刑松菊夫拜中令昔同鮑婦子昇  
瑣闥今類馮母舉案如賓闔門誠友在貴能降居貧施  
厚天道初革王風變韶維城落構若木疎條欽聞積善  
智洽仁昭克庇二族命服兩朝肅肅柔和如風是暢娥  
娥女師如月斯望潘輿獻壽仲祿方養不弔昊天何德



之喪嗚呼哀哉洛邑啟殯長安歸陌哭慟高臺旌懸舊  
宅階濕夜露庭陰曉魄嗟我外姻俱成弔客

為將軍高力士祭父文

維開元十七年月日孝子力士敢告於考潘州府君妣  
南海太君之靈小子不天夙齡閔凶身嬰寇剽家值虜  
裂幸供灑掃之餘遂蒙侍從之顧扶戴明聖逼畏艱難  
大固不敢不密小亦不敢不誠事必記心言無漏口日  
慎一日將二十年玉弁加首金章在佩先靈納祐明神

降鑒阿母遠至於京華妹兄自拔於泥滓咸以官漸榮  
祿姻通士林慈顏顧復於目前同氣展歡於膝下又緣  
幼育高氏變族移家敬愛盡於二堂溫清周於一紀不  
圖無狀招禍永見孤棄聖主恩華曲逮存歿邑封舊郡  
官贈本邦親感恩澤子承父意致命報天誓有同於皦  
日竭忠資孝志無忝於幽泉敬惟靈懷慰聞昭遂先遠  
有日卜葬新塋遙啟尊魂合祔泉壤哀迫祖載攀戀須  
臾謹以清酌少牢恭陳遣奠盈樽莫舉虛饌莫嘗號天

叩地殞絕何仰

為妓女祭故主之文

維神龍三年月朔日故妓人伏十善謹以清酌少牢之奠致祭於元十郎之靈淥流茂樹萍蘿是依山崩川竭魚鳥何歸恭惟主君高才達節賞心樂事風流不絕歌豔露華舞迴春雪幸持此技承君餘悅綺羅脂粉嬌上春自言終代保情親寧知一旦君魂斷繁絃清管為何人懷主君之異顧願徇命於九泉迫夫人之嚴旨遂投

足於他門生有十年之愛歿無一日之恩雖強容飾於  
新奉心摧絕而不敢言君子廣德仁心必遍疇昔與君  
琴樽歡宴永懷蕙歎俯憐荼苦錫以時珍申哀故宇歔  
車既展祖奠斯開悲歌助挽長袖乘盃平居好此魂來  
不來心思往而莫遂足欲返而遲迴終天地於此訣毒  
煩冤而難裁

張燕公集卷二十五